

ORDE do de de 2020 pola que se modifica a Orde do 4 de outubro de 2018 sobre selección e nomeamento de persoal interino para cubrir postos de persoal funcionario dos corpos xerais ao servizo da Administración de xustiza en Galicia.

A Lei orgánica do poder xudicial 6/1985, do 1 de xullo, prevé no seu artigo 472.2 que por razóns de urxencia ou necesidade se poderá nomear persoal funcionario interino, que desenvolverá as funcións propias dos corpos de persoal funcionario ao servizo da Administración de xustiza mentres non sexa posible o seu desempeño por persoal funcionario de carreira ou permanezan as razóns que motivaron o seu nomeamento.

O artigo 489 da dita lei orgánica determina que o Ministerio de Xustiza ou, se é o caso, os órganos competentes das comunidades autónomas que recibisen os traspasos de medios persoais para o funcionamento da Administración de xustiza serán competentes para o nomeamento de persoal interino, de acordo cos criterios obxectivos que se fixen na orde ministerial ou, se é o caso, na disposición da comunidade autónoma que recibise os traspasos de medios persoais para o funcionamento da Administración de xustiza.

En virtude do establecido no artigo 20.1 do Estatuto de autonomía de Galicia e da transferencia de funcións á Comunidade Autónoma de Galicia en materia de medios persoais ao servizo da Administración de xustiza, realizada a través do Real decreto 2397/1996, do 22 de novembro, e asumida pola Xunta de Galicia a través do Decreto 438/1995, o persoal funcionario do corpo de médicos forenses e mais dos corpos de xestión procesual e administrativa, de tramitación procesual e administrativa e de auxilio xudicial dependen organicamente da comunidade autónoma. Esta dependencia instruméntase a través da Vicepresidencia primeira e Consellería de Presidencia, Xustiza e Turismo, á cal lle corresponden as competencias nesta materia, segundo o Decreto 130/2020, do 17 de setembro, polo que se fixa a estrutura orgánica das vicepresidencias e das consellerías da Xunta de Galicia, e o Decreto 214/2020, do 3 de decembro, polo que se establece a estrutura orgánica da Vicepresidencia Primeira e Consellería de Presidencia, Xustiza e Turismo.

De conformidade coa normativa citada, mediante a Orde do 4 de outubro de 2018 (DOG núm. 204, do 25 de outubro de 2018) regulouse a selección e nomeamento de persoal interino para cubrir postos de persoal funcionario dos corpos xerais ao servizo da Administración de xustiza en Galicia.

Con posterioridade, diversas circunstancias, como os cambios normativos producidos en materia de igualdade de oportunidades, particularmente coa publicación do Real Decreto-lei 6/2019, do 1 de marzo, de medidas urxentes para garantía da igualdade de trato e de oportunidades entre mulleres e homes no emprego a ocupación, fan necesaria a adaptación das previsións recollidas na citada Orde do 4 de outubro de 2018 no relativo a maternidade e paternidade.

Así mesmo, e a vista da xurisprudencia recaída na materia, esta modificación prevé a supresión do artigo 22 que regula o cesamento do persoal interino por falta de capacidade e rendemento.

A modificación, así mesmo, flexibiliza os requisitos específicos esixidos para o acceso ás bolsas de traballo toda vez que diversas circunstancias, como o moi relevante número de xubilacións, a creación de novos órganos, ou o incremento dos plans de reforzo motivados pola elevada carga de traballo que soportan os órganos da Administración de xustiza, agravada pola situación derivada da pandemia orixinada pola Covid-19, aconsellan dispor dun maior número de integrantes para dar cobertura as necesidades actuais de provisión de postos desocupados.

Polo exposto, logo de negociación coas organizacións sindicais con representación na Mesa Sectorial de Xustiza, e no exercicio das atribucións conferidas segundo o artigo 38 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, así como polo artigo 34.6 da Lei 1/1983, do 22 de febreiro, de normas reguladoras da Xunta e da súa Presidencia,

DISPOÑO:

Artigo único. *Modificación da Orde do 4 de outubro de 2018 sobre selección e nomeamento de persoal interino para cubrir postos de persoal funcionario dos corpos xerais ao servizo da Administración de xustiza en Galicia.*

A Orde do 4 de outubro de 2018 sobre selección e nomeamento de persoal interino para cubrir postos de persoal funcionario dos corpos xerais ao servizo da Administración de xustiza en Galicia, modifícase nos seguintes termos:

Primeiro. O apartado 1 do artigo 7 queda redactado como segue:

“1. O número de integrantes das respectivas bolsas determinarase na correspondente convocatoria, previa consulta á Comisión Paritaria de Interinos, tendo en consideración distintas variables, como o número postos totais en cada provincia, o número de funcionarios interinos nomeados á data de publicación da convocatoria ou necesidades previstas durante o tempo de vixencia das bolsas que se convocan.

Segundo. Suprímese a letra i) do apartado 1 do artigo 8.

Terceiro. O artigo 9 queda modificado nos seguintes termos:

O apartado 2 queda redactado como segue:

“2. Ademais das titulacións requiridas para cada corpo, deberá reunirse algún dos seguintes requisitos, antes de finalizar o prazo de presentación de solicitudes:

a) ter aprobado algún exercicio das probas selectivas **das tres últimas convocatorias** para o ingreso en calquera dos Corpos de Xestión procesual e administrativa, de Tramitación procesual e administrativa e de Auxilio xudicial.

b) ter prestado un mínimo de dous meses de servizos en calquera dos Corpos de Xestión procesual e administrativa, de Tramitación procesual e administrativa e de auxilio xudicial.”

Cuarto. O artigo 10 queda redactado nos seguintes termos:

“1. Baremación.

O persoal aspirante que reúna as condicións establecidas nos artigos anteriores será seleccionado e ordenado na correspondente bolsa en función da baremación dos seus méritos.

Valoraranse e baremaranse os seguintes méritos:

1º. Probas de acceso:

a) Superación de exercicios das oposicións realizada para o corpo a que se opta, concepto polo cal se poderá obter unha puntuación máxima de 24 puntos:

– Para o corpo de xestión: 5 puntos por cada exercicio superado da última oposición. Puntuación máxima: 15 puntos.

– Para o corpo de tramitación procesual e administrativa: 5 puntos por cada exercicio superado da última oposición. Puntuación máxima: 15 puntos.

- Para o corpo de auxilio xudicial: 8 puntos por cada exercicio superado da última oposición. Puntuación máxima: 16 puntos.

– Para todos os corpos: 3 puntos por cada exercicio superado na penúltima oposición. Puntuación máxima: 9 puntos.

b) Superación de exercicios doutras oposicións de Xustiza, concepto polo cal se poderá obter unha puntuación máxima de 5 puntos:

– Por calquera exercicio superado nas tres últimas oposicións dos distintos corpos da Administración de xustiza, excepto se xa se valorou conforme o disposto na anterior letra a): 1 punto.

Puntuación máxima desta epígrafe 1º: 29 puntos.

2º. Tempo de servizos prestados:

0,25 puntos por cada mes completo de servizo como funcionario interino da Administración de xustiza naquel corpo funcional onde solicite ser incluído.

0,15 puntos por cada mes completo de servizos como funcionario interino da Administración de xustiza nun corpo funcional superior a aquel onde solicite ser incluído.

0,10 puntos por cada mes completo de servizos como funcionario interino da Administración de xustiza nun corpo funcional inferior a aquel onde solicite ser incluído.

Puntuación máxima desta epígrafe 2º: 40 puntos.

3º. Coñecemento da lingua galega:

- Certificado Celga 4 ou equivalente: 4 puntos.
- Curso de linguaxe xurídica de nivel medio: 8 puntos.
- Curso de linguaxe xurídica de nivel superior: 12 puntos.

Puntuación máxima desta epígrafe 3º: 12 puntos.

Só se valorará o curso de maior nivel dos presentados. Tampouco se lles valorarán os cursos de iniciación e perfeccionamento aos solicitantes que acrediten o curso básico de linguaxe xurídica.

4º. Titulación académica:

a) Pola licenciatura ou grao en Dereito: 4 puntos.

b) Pola licenciatura, diplomatura ou grao en Ciencias Políticas e da Administración, Ciencias do Traballo, Relacións Laborais, Xestión e Administración Pública, Graduado Social ou Criminoloxía: 2 puntos.

De igual modo, pola superación dos tres primeiros cursos da licenciatura en Dereito ou pola obtención de 180 créditos de grao en Dereito ou noutra titulación universitaria equivalente adaptada ao Espazo Europeo de Educación Superior (nestes casos será necesario o correspondente certificado que o acredite, expedido pola autoridade competente): 2 puntos.

Puntuación máxima desta epígrafe 4º: 6 puntos.

2. No suposto de empate, desfarase pola maior puntuación obtida seguindo a orde establecida neste artigo. De continuar o empate, terase en conta a puntuación obtida no primeiro exercicio das últimas oposicións realizadas para o corpo a que se opta, e, na súa falta, ou de persistir o empate, observarase a prioridade alfabética comezando pola letra correspondente á última oferta de emprego para os corpos da Administración de xustiza.

Quinto. O apartado 3 do artigo 11 queda redactado nos seguintes termos:

“ 3. As solicitudes presentaranse en todo caso telematicamente, no prazo e forma que se indicará na resolución da convocatoria para o que as persoas solicitantes deberán de contar cos mecanismos de identificación e sinatura electrónica admitidos pola comunidade autónoma de Galicia.”

Sexto. O apartado 5 do artigo 14 queda redactado nos seguintes termos:

“5. No caso de que o informe do/da superior funcional sexa desfavorable, a xefatura territorial iniciará o correspondente expediente contradictorio, no cal se poderán solicitar outros informes, e o/a aspirante a interino/a afectado/a poderá presentar as alegacións e propoñer as probas que ao seu dereito conveñan no prazo de cinco días hábiles desde que lle fose notificado o inicio do expediente. Se a xefatura territorial estiver conforme co informe do/da superior funcional, resolverá a non superación de período de prácticas, co conseguinte cesamento no posto e a exclusión definitiva da bolsa.”

Sétimo. Os apartados 2 e 3 do artigo 16 quedan redactados nos seguintes termos:

“2. Non procederá a exclusión da bolsa cando a persoa seleccionada demostre e poña en coñecemento da correspondente xefatura territorial as seguintes situacións:

a) Incapacidade temporal xustificada mediante parte de baixa médica ou documento similar, expedido por un facultativo da Seguridade Social que acredite a situación de incapacidade o día en que se produce o chamamento.

b) Maternidade, se a renuncia se produce entre o quinto mes de embarazo e o período de permiso que recoñeza a estes efectos a lexislación vixente.

A persoa proxenitora diferente á nai biolóxica, se a renuncia se produce durante o período de permiso que recoñeza a estes efectos a lexislación vixente.

c) Coidado de fillos menores de tres anos de idade ou dun familiar ata o segundo grao de consanguinidade ou afinidade que, por razóns de idade, enfermidade ou accidente non se poida valer por si mesmo e non desempeñe actividade retribuída, sempre que se acredite a convivencia cos devanditos fillos ou familiar.

d) Adopción ou acollida, se a renuncia se produce durante o período permiso que recoñeza a estes efectos a lexislación vixente.

e) Incoación de dilixencias xudiciais, nos casos de violencia sobre a muller, en que estea incurso como denunciante.

f) Actividade profesional, no sector público ou privado. Neste caso o dereito á suspensión do chamamento só se poderá exercer unha vez.

3. En todos os supostos relacionados no punto anterior, bardante dos casos previstos nas letras a), b) e d), a persoa interesada deberá ter solicitada electrónicamente e autorizada a suspensión de chamamentos con anterioridade a que estes se produzan,

para o cal deberá presentar ante a xefatura territorial correspondente a documentación acreditativa necesaria. Así mesmo, cando desapareza a causa, a persoa interesada comunicarllo á xefatura territorial no prazo máximo de cinco días hábiles para a súa reincorporación ao seu posto na bolsa respectiva. Esta reincorporación producirase de modo efectivo o día seguinte hábil ao da recepción da correspondente solicitude electrónica. Sen prexuízo do anterior, as persoas en situación de suspensión temporal previstas nas alíneas a) e f) deberán acreditar cada tres meses que persiste a situación que xustificou a suspensión; de non o faceren, serán expulsadas da bolsa, o que se lles comunicará mediante o sistema de notificación electrónica.

Os efectos da suspensión produciranse ao día seguinte hábil ao da presentación electrónica da correspondente solicitude ante a xefatura territorial; momento en que, de non ter denegada expresamente a súa solicitude, entenderase autorizada.”

Oitavo. Suprímese a letra d) do apartado 5 do artigo 21.

Noveno. Suprímese o artigo 22.

Décimo. O apartado 3 da disposición adicional primeira queda redactada nos seguintes termos:

“3. A persoa solicitante, que deberá cumprir os requisitos previstos nesta orde, será baremada segundo o disposto na mesma, computándose os méritos na data de convocatoria das bolsas previstas nela. Segundo a puntuación obtida, incluírase ao final da bolsa que corresponda, sempre que acade a puntuación do último integrante do corpo en que solicite a súa inclusión. A inclusión terá lugar no momento en que se produza unha exclusión que o permita, sempre que non se altere o número de integrantes indicado na correspondente convocatoria, nos termos indicados no artigo 7 da presente orde.”

Disposición final única. Entrada en vigor.

A presente orde entrará en vigor ao día seguinte ao da súa publicación no Diario Oficial de Galicia.